

樊山全集

上海廣益書局印行
批判

自序

余服官十年凡有訟牒皆手自批荅先後殆以萬計光緒丁亥以前概未錄副而民間頗有傳鈔同人索觀無以應也庚寅辛卯居京師李慈伯師謂余公牘別是人間一種文字可與入官者作前馬而沈君子培亦云古今政書雖夥求其切情入理雅俗共喻者蓋眇而以余之判事為獨有心得師友譽勉感莫能忘壬辰戡再權咸寧乃命寫官裒錄批詞得十許帙比至渭南檢視則又佚其大半不知誰何攫去矣宰渭四年批牘益夥乃擇其有倫要者得十分之一付之手民大率訟牒之來不外準駁兩途訟師即持是以覘官之能否每一批出能抉摘紕漏動中竅要使無情者不得肆其譸張而冤結者先有伸理之望未經訊

鞠而人心震動其至升堂判決平情斷事枉直分明使觀者同聲稱快固亦居官之一樂也今茲所存批多判少良由批詞隨來隨答至案經訊結則由吏人叙供擬判苟大意不相背謬即亦不復潤飾惟案情較重及近怪者乃據案手自作判然卷中以批為判者正自不乏在讀者自取之耳至批詞中頗有俚俗者冗複者怒罵者游戲者皆為大雅所不屑良以縣令於民最親而民又最愚文有不解質言則喻要言不解詳言則喻善道不聽切責則懼莊語不入出以諧笑則愧且悟矣父母之於子情親而無文縣令視民如子誼當如是

批

恩施樊增祥嘉父

代定興公批城固令五門堰稟

稟冊閱悉該縣五門堰要工歲派民錢五六千串深為苦累經現署新疆庫車同知前署城固令張開鑑於同治三年以辦公餘款置田二百畝嗣又添為三百餘畝議定每年租利不准提用俟本大利厚歲息積至三四千串方可撥歸堰工該民即可永除攤派良法美意深屬可嘉前由張永塞外具稟請飭查辦當由封令稟稱開辦之初係邑紳王詰經手同治九年以後歸紳富盧艱光管理旋由侯令會同查核歷年帳目契約輾轉不清虧短甚鉅因盧紳不服致周守親查因周守所議未妥批飭侯令再往查算茲據造冊會稟前來其情形業已洞明而辦法尚多姑息如所稱現存官田及發商存款實足三萬串之數以歲息八釐計之可得錢二千四百串此項息錢今年之子即為來歲之母由母生子由子生孫尊乳循環有加無已以本部院計之果能經理得宜不過六七年即可手大於母來稟謂須十餘年周守前稟謂須二十年殊不可解果能如本部院所言得錢即放收租即糶輾轉居積何待多年如本錢真過六萬歲息即近六千堰民可以永除科斂茲據稟稱擬以歲息二千餘串全數撥歸堰用尚不足堰工一半之需小民仍須攤派殊失立法本意仰仍開諭堰民前此為劣紳所誤悠忽垂二十餘年事已如此幸尚有基可為姑再茹痛數年為一勞永逸之計欲速見小則不達不成甚非策也此次經本部院飭查嚴辦期於必成而止惟事不懲前無以毖後此事雖由王詰奸貪盧紳昏賈而歷任印官所司何事於邑中如此大政聽其把持二十餘年毫不過問是該令人人木偶故該紳歲歲侵漁本部院遙度情形不但劣紳乾沒恐歷任之官吏丁差無不仰食陋規從中染指觀於張永所稟前令晉

省欲提堰費三百串作川資即此可見一斑矣若執既往不咎之說後來者何所警畏仰布政司查取同治九年以後城固縣歷任各官職名各記大過三次此後如有擅提堰款者勿論公用私挪一經查出即照虧短錢糧之例立即撤參以為玩泄者戒封令未經稟請擅動堰費一千串作為春振殊屬荒率前稟自認籌還此稟又云窒礙擬即請作罷論等語是該令提用之初本無籌還之意現值認真查辦之際應令如數賠交以警專擅但念二十年來之城固令無一人問及此事自封令到任後採聽臆言更易紳董盧王二人之弊實甫能和盤托出地畝從此核實存款從此有著是該令雖有擅提之咎亦有經理之功功過相抵姑免賠還以彰公道至王詰係四川註誤人員經營六七年漫無查考至眾議不容乃欺盧覲光昏庸易制姑令接管又使其黨陳新銘廁身局內潛肆把持來稟猶謂有始事之勞查張丞以餘款置田並非王詰捐辦受事之初既多含混交代以後又欠清釐查算之時復敢刁阻而且遺書塞外焚燬張丞種種奸欺無功有過真假冒雖無實蹟而陳新銘係其私人由其引用陳姓所虧之錢即與王詰所虧無異稟稱陳姓故絕應令已故王詰之家屬查照原虧數目代為賠補以警奸貪而濟要款盧覲光既係該縣富紳接管此等要工鉅款宜何如潔已奉公乃定章歲一結帳俾眾周知而盧紳二十年來從未清算一次及封令任內被人指控改派堰紳清算猶敢隱匿簿籍把持抗阻平日所置局中田產有有田無約者有有約無田者又將生息活錢私行借給徐鴻儀黃奮志等至八百餘串其並未存放取息自行挪用酌量減讓以後尚有一千七百餘串之多營私誤公實堪痛恨而猶抗不遵斷敢出狂悖之詞妄稱冤抑來稟猶謂其人素長厚長厚者固如是乎又謂事為陳新銘所誤究非自蝕公款譬如該令等虧短錢糧謗係丁幕所為遂可置身事外乎須知此項官田全為堰民而設堰費多增一分之息堰民即少出一分之錢數千串之息早一日成功即數千戶之民早一日

免累梓桑膏血盡在王詰盧艷光兩人之手而延誤至此使堰民歷年所出水錢數逾十萬串以外窮源溯本盧王二紳之咎萬死何辭據理而論盧紳虧短之項應令按本計利照數持出方為公允乃除息錢不計外候令減讓一次周守又減讓一次僅令持出一千五百串了事不知該守令等何愛此一人之糊塗而不念數千家二十年之痛苦今由本部院斷定盧紳雖死應令其家屬實繳出吞沒堰費錢一千七百串不得短交分文至陳新銘董海門二人虧短錢五百六十四串該二人雖皆故絕然陳姓係王詰私人虧款已令王姓代賠董姓係盧艷光所用即著盧姓代賠務令盧王兩家交足虧短堰費五百六十四串而後已如敢抗違由該令提屬嚴追決不寬貸此項堰本經此番追查以後本愈大而息愈豐務須切諭新首趙呂兩生不得蹈彼覆轍亦不得視為畏途須知盧王二紳之得咎係屬自取地方諒有公評官長並非谿刻本地公事必須本地正紳實心經理明任勞怨實則暗積陰功如果辦有成效本部院敬禮之不暇豈肯摧辱挑剔耶此後遵照原議必須積至息錢四五千串足敷一年堰費不再攤派堰民而後已蓋小民凡短之見每貪近利而昧遠圖而為民父母之心當計成功而籌全局仰布政司分別移行該管道府轉飭城固縣查照更訂章程二年一易首事一算帳目除冊報本道本府外並造清冊二分費由本部院及布政司衙門查考該縣遇有更替即將田賦局照倉庫之例列入交代項下移交後任接收並由該管堰紳出結備查以後地方無論何項公事不得動發商之本田賦局內亦不得存無息之錢凡更換堰紳查照向例由閭縣公舉由該令關訂隆其禮貌方可責其成功理財用人誼當如此現在封令丁憂本任李令從前在官時漫不經心業經記過示警此後務須矢慎天勤力成善舉以副委任切切餘照所稟辦理仍候督部堂批示繳冊存

代定興公批富平焦令到任稟

據稟要政四條曰豁坍糧曰查荒地曰疏舊渠曰戢客民具見乃心民瘼力求整頓深堪嘉悅惟功不可以速成法必籌其至善以本部院計之該縣入手之初當先晰明土客之地畧者客民領墾荒地客頭赴縣報名或數十畝或百餘畝縣署並無案據客民亦無執照但由里長指給一處即相率開墾迨年滿升科里長索若干之糧客民則稱短若干之地紛爭呈控無月無之今宜責成各里之里書里長客頭等會同書役將各該客民領墾之地清查一次其地實有若干納糧若干註明紅冊填給執照使該客民永為己業再有狡黠刁抗者即重懲遞籍如此則糧賦均平而土客之爭息其大半矣其次則查隱匿該縣腴地鮮有不開墾者而報荒之糧尚有一萬六千兩之多其為漏征無疑此項漏征之銀大半為里書糧差及紳民之豪強者朋分其利而窮民小戶或轉賠納無地之糧此事之最不均者也該令有意清查誠為當務之急然但云匿報有罰告發有賞辦法尚欠妥善此令一出凡倖賞者挾嫌者皆借告發之名逞私獎聽必有無辜受累者甚不可也欲辦此事惟有既往者從寬現在者核實該令前此到任日淺此次亦恩信未深未可輕言舉辦須於平日周歷村堡勤見紳耆俟情形透熟官民相信然後擇紳士中之明白公正能服人能了事者或十餘人或七八人分赴各聯督同各里書先查荒地實有若干再查熟糧實征若干兩相揅對隱匿自出再查此一聯中隱匿之糧在於何里此一里中在於何甲此一甲中在於何戶此一戶中係屬何名退出之後不必苛罰但將紅冊註明令其如數交納各聯清查既畢由各該紳開具清單交案彙造成冊核明實增糧賦若干即將此項溢出之糧抵向來賠納之賦凡有糧無地者概予豁免如此則政不煩而民不累矣至石川兩岸之坍糧誠為民累但上下數十里查勘非易須斟酌行之若疏通舊渠乃民間自然之利亟宜舉行至稱以客查客擬四鄉各派客頭一人云云此人實難其選又稱於無事時分派壯役數十人下鄉巡查則大不可約束客民

向有保甲章程凡客民住居何里即附於是里之後編為一冊各歸各甲長管束土著客頭互相鉗制方為妥叶今若以客查客則恐其徇私以役查客則必致滋擾大凡有家屬有地畝之客民必不敢公然為匪其或單身無眷屬面生無認識及一切賣雜藥唱小戲者遇其入境即行驅逐倘或滋事即行遞解如此則良莠分明主客安謐矣總之該令見義勇為樂善不倦乃本部院所深信者惟每作一事必須徹始徹終籌畫盡善方可施行本部院所言特其大略至於臨幾因應非畫宮於堵所能賅也該令如有所見仍可隨時稟請示遵此繳

代定興公批已革武舉阮大德上控山陽沈令呈詞

此案前據山陽縣沈令稟報武舉阮大德私鑄小錢姦佔郝義娃之妻郝方氏等情到院批飭該州提審久未定讞該革弁阮大德屢次遣抱赴省以挾嫌誣陷等情具控節經明白批飭茲復以前情稟控行轅細核此案全卷該革弁恃武舉之勢橫行鄉里藐抗官府事所必有決非妄分之徒其私鑄小錢姦佔民妻皆所優為之事沈令所稟未必全涉誣枉惟其中疏忽紕繆種種可愕不啻授人口實延今二年愈審愈無把握者則沈令自貽伊阻也溯查光緒十五年七月任長清盤獲魏仁貴之後既據供出伊與阮大德何文學合本私鑄小錢僱用黃機匠看火等語該令不於此時立赴阮家踏看形跡起獲爐罐等件乃仁貴於七月七日獲案延至十月廿八日始行往勘俾阮大德等得以彌縫無跡似此疏漏迂緩已覺令人焦憤魏仁貴身苟不死阮大德何敢不承乃該令漫不經心致魏仁貴服毒自盡該革弁之得以狡展實由於此彼時黃機匠逃矣魏仁貴死矣幸而何文學到案是此案一點真命脈得以取供定讞者全在此一人身上該令案關切已宜何如加意防維乃正當批州提審之時遽以何文學在逃詳報實屬荒謬已極據維令查明稟稱何文學之父何祿元賄囑書差縱令逃逸而何祿元

始終並未到案書差到州後全行翻供案情愈覺不實以致阮大德恃無對証堅稱魏仁貴之死該令
毒之何文學之逃該令縱之雖係仇口怨言豈無自取之道阮大德又稱郝方氏之奔控悉由該令主
使查閱州卷郝方氏有劉二管辦之供及該氏起解又稱有縣署王老爺與伴婦一同相送是該令縱
非主謀唆陷亦屬不避嫌疑夫以身繫圍扉罪當大辟之犯幸而無憑無証可冀僥倖得生此雖至愚
極庸者亦必輟轉求脫而況桀黠之尤如阮大德者乎今此案延宕已久拖累多人殊屬不成事體仰
該州李牧嚴飭沈令勒限一箇月將已獲復逃之何文學黃機匠及未獲之郝義娃一併拏案與該革
弁質証明確以關其口而服其心俾得早成信讞一面先提何祿元及書差曹德義等質究何文學究
係因何逃逸再查州卷十六年三月初一日有何文學之父何祿貴以串供朦陷等情控請賀丞轉詳
賀丞批飭未准何祿貴是否即何祿元所控各情是否阮大德暗中唆使此亦案內關竅尤應確切訊
明至禁布聲劉國順是否教供轎夫劉老公有無其人該革弁之鄰右及木瓦匠人等是否知其私鑄
於前拆改房屋於後凡阮大德前後所控各情均應澈底查究以免該革弁逞刁藉口其逸犯限滿無
獲即著照例揭叅勿稍徇縱切切詞發仍繳

批姜恆泰稟詞

此案據該紳與郭文壽迭次互控節奉藩憲府憲札飭仰兩縣查議稟復在案查咸長公局起自同
治六年爾時軍務方殷兵勇持銀易錢動輒爭攘於是各錢行釀錢六千四百餘串設立斯局使郭文
壽領之專與兵勇交易是其始本為便民光緒八年郭文壽稟請出局舉姜紳恆泰自代
鋪相輔而行即各鋪戶亦裨益不少是其繼又為便民光緒八年郭文壽稟請出局舉姜紳恆泰自代
交替之際互相推重見諸稟牘及九年秋公局出票百餘萬屬集取錢局事幾不可問幸而彌縫補救

化險為夷旋於十一年將蚨票收清奉文撤局即據郭文壽稟控姜恆泰貪得無厭蒙混不實等情復據姜恆泰稟陳始末緣由請飭郭文壽將長支銀錢及房院地基一齊交出各等語查前此姜郭交替之時除底子錢六千四百餘串外尚有贏餘銀一萬三千兩而歷年官商借欠急難收計之帳計一萬九千有奇經前藩憲批飭在於贏餘項下以三千為郭姓酬勞之費以萬金為公局護本之需至急難歸款之銀既有約據可憑應由姜紳設法清理各等語此次撤局所有萬金之護本及六千餘串之底錢自應如數呈交以昭核實嗣據姜紳稟稱外帳難於收齊房產不能變價懇將護本及底子錢準折一萬九千兩無著之帳奉藩憲批以護本抵給外欠事屬可行仍應調驗約據銀數是否相符眼同塗銷免生枝節至鋪底錢六千四百餘串著趕緊措交以備善舉各等因旋據姜紳於十一年十二月將鋪底錢呈交到案復於本年六月將歷年官商約據四十九件底帳一本具稟貴案前來是該紳於應交應抵之項悉已清釐可以結前案而清後累矣惟據兩造互控不休勢成水火郭姓請將家具局底及票本贏餘錢五千八百餘串一切領歸姜紳又謂郭姓前後侵吞銀二千七百餘兩錢二千八百餘串懇請如數追交各在案本縣細核全卷前後情節俱已洞悉在郭氏本非已業何得妄冀歸還在姜紳早已接收何又控其侵蝕其前則互相標榜宛君子之相親其後則極意詆譭近小人之爭利而不知其皆非也郭文壽以市井徒領局十五年居然殷富乃假老病之名掩其飽颺之跡功成受賞事外優游可謂巧矣查公局初開雖僅有底錢六千數百串然積年所獲皆公局之利非郭姓之利也乃竟揮霍贏餘結交官府使外欠無著之款至一萬九千之多領本貿易者固當如是乎幸而前憲寬仁姜紳同氣郭姓受人覆翼誼當銜感於心乃於局事敗壞之餘乘危覬產居心貪險情理奚容查八年郭姓原稟稱將票本存留外欠之外及實存銀錢各數目一一與姜紳交割明晰並以付託得人為幸

初未言將來撤局鋪底家具仍歸郭姓經收也今乃以未開之票本作爲贏餘現存之家具私爲己有謂一切當歸郭氏不知交割之時局中所出蚊票有二十五萬之多家具一切即在二十五萬票本之內先已隨同交付何能復覓珠還至未收之票尚有五千八百餘串即使真有此項亦宜照底錢之例呈繳入官郭姓乃欲攫入私囊何其貪愚老諄況據姜紳稟稱未開之局票雖係五千有餘而浮開之偽票更在七千以外誤開者不可追未開者尚待發郭姓欲以贏餘歸己試問賠累歸誰乎至姜紳所控侵吞各節或亦事屬有因惜其言之太晚查該紳入局之始推崇郭姓不遺餘力據稱郭姓苦心經營兵民相信關係地方誠非淺鮮又云公局原設只收各錢鋪幫差底子錢六千四百餘串並無絲毫官款郭紳經手十五年除支銷身俸火食門面襍差不計外現存鋪底及外欠之外並現在行使錢帖二十五萬之票本兩相頂抵並無虧短又云郭紳於地面公事並無貽誤銀錢毫無虧短洵能潔已自愛顧全大局除將原奉定章及一切銀錢接收清楚出具無虧押結申費憲轅備案外理合縷晰陳明云云此皆姜紳入局時力保郭丈壽之言也尋奉批鋪內差底及票本既據該紳出有押結申費鐵案如山無能更易是一經出結之後郭姓即有虧短姜紳亦不得異言明矣今乃於郭姓稟許以後輒稱當日郭姓出局不敷錢若干長支銀錢各若干佔去房院地基若干修理銀又若干一併稟懇追繳前來果有此情該紳當日何以貿然接收數年以來何以代爲掩覆局事敗壞以後何以甘心墊賠既經接收矣掩覆矣墊賠矣何又突請追究翻雲覆雨惟在兩手之間加膝墜淵出於一人之口試問當日出結者誰乎書押者誰乎自愧不如者誰乎代爲請獎者誰乎總之郭姓無良姜紳無信狐埋狐搨兩造同之今由本縣看定郭文壽所稟貪冒不實應無庸議姜紳經手底錢約帳悉已呈交由本兩縣分別存改塗銷申費存案該紳從此永無膠葛其指空郭姓各節既經出結在前斷難翻案亦無庸議惟

據姜紳來稟稱冤呼累意頗不平查該紳八年入局局票僅二十五萬一年之內增放至一百十七萬串之多是以謠言一起舉國倉皇幾使大局不支身家俱敗是該紳之累累在貪心非累在公事但當責已何可尤人至謂以護本頂抵外欠尚不敷銀九千餘兩此亦昧心之言矣查郭姓出放萬九千兩之外債名為借貸實與餽贈無殊該紳當日通融接收本屬視同甌脫今幸藩憲恩施格外許以無著之濫帳抵實在之本銀本縣方謂便宜該紳乃稱枉抑人心不足一至於此今局事已藏公款已清兩家各擁資財正可交相慶慰乃以雷陳之膠漆尋餘耳之干戈必欲屈膝公庭自傷顏面吾不知其何心也該紳如果見機即可遵批息訟如不見機仰候本兩縣稟明層憲牌示堂期各以本身到堂質對惟是事關帳項尤以見証為憑查八年四月有局夥林茂等以藐憲違章等情控兩二人到案據稱郭姓偽立堂名濫提公款姜紳未入局以前即欠局銀二萬餘兩入局後一事未理又用局銀一萬數千又擅將局內抵收是姓房院一所撥歸郭姓兩日各憲用人之際未忍追求特將林茂等遞籍管束在案今據兩二人互控各情合之林茂等所訟似覺實有侵漁如兩等悔禍息爭相安無事可也若必負氣求勝則當提同當日局夥林茂或代勸苟玉昆等照依前後所控各節逐層察究澈底澄清苟坐昧於先幾必自貽貽夫後悔該紳等其慎思之勿忽

批徐光福呈詞

爾在皋蘭幫夥拘吞李思恭號銀二千七百餘兩復勾串設姓帖送掌櫃謝天順到縣致謝姓瘦斃因圖喪良作孽十死不足蔽辜嗣經皋蘭縣於光緒十年移解到咸斷令變產還銀一千四百兩官經七任責比累年刁抗冥頑分釐未給茲又據稱李思恭亦於去冬病故是爾既欠銀債又欠命債豈獨不容於官府抑亦觸怒於鬼神猶自謂拖累無期試問誰拖累乎本應提案嚴追以懲奸騙姑念班廳

幽繫已逾十年仰原差查明李思恭是否身故其家尚有何人徐光福是否家產盡絕其母妻是否已死詞內所列田姓任姓是否曾經管和其資東是否曾經應允一一詳悉稟案聽候核奪

批于慎德呈詞

爾六房以八千兩血本付與一羣混賬東西數年之間化為烏有爾固有付託非人之咎而封兆慶等均喪屬良無恥之尤若不提案嚴追何以創懲奸騙候覆訊澈究不貸

批田長恆訴詞

于氏八千血本虧折無存爾係漢莊掌櫃咎無可辭至于慎德初控僅楊吉甫一人乃是爾等甘言懇免事後又避匿不面是于慎德始終為爾等所欺爾尚謂資東忽起狼心含混捏造似此鬼域伎倆豈能在本縣案前嘗試爾住在漢口熱鬧地方拿著東家本錢胡嫖混賭一朝閉歇搖擺還家債累無窮盡歸于氏爾與封張等真可謂狼心狗肺矣本縣疾惡如仇候提案重懲不貸

批姜升稟詞

王如卿父子貪詐狡譎爾主受累不淺現在如卿遠遁家具虛懸致街房不能出賃查雷姓既與王姓合夥王姓雖逃雷姓尚有一半在內何妨承領接做倘畏如卿回家攬局案經官斷何畏宵人仰即商同雷姓擇日開門按月起租將來如卿回陝或交還家具或算給錢文均無不可如雷姓必不承領即著工房協同鄉長地方人等即日前往該舖點明家具粘貼封條相度公所地方將各具移放其內封鎖嚴固俟本主王姓回家認領街房即日騰交業主聽其租賃仍將各家具估定價值開列清單存案以免王如卿將來混攪快班田雲著一同前去限兩日內遵批妥理具覆勿違

批陳裴氏催呈

查閱全卷且怒且笑爾子陳德福娶劉世芳之女為妻旋即物故爾媳劉氏年僅二十孀婦再醮例所不禁爾心貪性狠欲將劉氏帶回河東原籍多賣銀錢劉世芳父女情切聞信阻擋理所當然爾遂架詞控案嗣經前任酌斷娘婆兩家商同主婚改嫁財禮歸爾獨得可謂便宜之至隨由劉世芳與爾商定憑媒馬春榮說合寫立婚據受錢六十串嫁與王姓不意爾奸貪潑悍事後一口昧賴堅稱劉氏再嫁爾未與聞其事必欲索還孀婦爾之本意非錢多不能了事非索人不能加錢幸遇前任任仁明任爾說長即長說短即短將劉世芳父子管押兩年之久刑比二十餘次斷令將王姓財禮退回已醮有孕之王門劉氏交爾收領事雖未行前縣於爾可謂仁至義盡矣爾猶恃其潑悍一控府憲兩控藩轅及批訊過堂膽敢用剃刀偽抹恐嚇縣官前縣寬仁毫不加責且將劉世芳責打平爾之氣雖因開堂抹頸詳請遞籍而至今未行去年臘月初二十四等日猶送將世芳之子劉老虎刑責限日交出王劉氏俾爾具領詳判兩歧不解何故查劉世芳以養女弱門遭離多故其女劉氏墜亡姑悍歸葬命娘天理人情亦國法之所不禁且劉氏未經再醮令其奉姑守節猶可說也業已嫁與王姓且有孕矣而爾必欲奪回官亦屢令交出惟強索劉家之女並且強奪王家之孕誰非父母誰無兒女糊塗顛倒天理何存閱卷至此真令天下父母心不重生女重生男矣今遇本縣到任是爾運退之日豈惟人不能交即財禮六十串亦不能歸爾獨得仰原差即日送審聽候明斷

批封兆慶稟詞

爾封兆慶領資貿易本利俱無構訟以來避不到案實屬奸狡已極楊永慶前堂供稱大事由爾與張錫齡作主今又謂爾係外行資東另用內行數人此數人者何姓何名現在何方豈能以爾預之詞推卸乾淨至楊永慶為子氏積年東夥任聽封兆慶等奸弊百出不能救正以至潰敗決裂而不可止亦

屬咎無可辭均俟堂訊究懲勿庸妄瀆

批善邢氏呈詞

爾夫身故乏嗣爾遵遺囑於光緒十五年正月同親族議立夫兄次子善及財為嗣喪事未辦先將衣服及銅錢六十四串概行搬去爾身非木偶何以任其吞擄不惟不行阻擋而且同院隣當面點交殊出情理之外及夫喪入土嗣子假言迎養意存逼嫁於十五年秋季間趕爾母女出門事到如今已歷三年之久爾何竟隱忍不控此三年中爾母女兩人又在何處棲身憑何度日情詞種種支離萬難憑信姑候飭差協約問明院鄰族長公同詳細稟案以憑核奪

批李學世呈詞

爾寄存銅錢三十一串於賀文興店內賀姓身死妻嫁僅給爾爛被十五床了事反將爾送與巡官責打二十軍棍果如所呈情殊冤抑惟據稱賀姓死後曾經坊鄉各約說合賀李氏再醮之日如數總給及李氏另嫁爾查知不依坊約等言猶在耳何能一口同音代為挺抗若謂受該婦賄賂能有幾何豈能人人為之出力而且巡官打人亦須問明是非爾如此有理反受軍棍恐無此糊塗巡官必係爾藉事訛詐致觸眾怒事後猶不悛改希圖控累多人不准併飭

批屈自有呈詞

屈自遠乃爾姪胞叔爾則堂叔也屈自成在外生理欲為其子圖房函致胞弟可矣何必請爾經營花燭且自遠果將姪媳藏匿爾姪屈知賢何以不控要爾出頭插管其中恐有挾嫌誣陷之處姑候喚案訊奪

批色欽圖息詞

金季氏未曾控縣輒以焦公不理事代書不寫呈等詞越訴府縣既經上發豈可私銷仰原差於兩日內送審訊明懲創所懇息銷之處不准遵結發還

批王世玉呈詞

王世成係爾胞兄爾開口即云素行不軌是爾兄縱抱愧天倫爾亦並非悌弟所呈各節恐亦未免言過其實姑候喚案察訊

批劉長福呈詞

爾枕匣中既有銀兩自應封鎖牢固鄭姓乘爾在院中洗襪輒即開箱竊取大凡做賊之人必須背人行事今乃青天白日明明有陳席氏在門外縫衣鄭姓毫不避忌公然開箱攫物似覺無此情理現據鄭薛氏以証良為盜等情控爾到案已飭約役票奪茲據互控姑候喚案察究

批趙月曉呈詞

趙三羣誠然可恨但引賊入門者乃爾之寡嫂也爾不能防範於前而徒欲本縣追贓於後爾試看趙三羣父子窮無立錐縱使立斃杖下原贓亦難盡獲依本縣相勸爾從今以後永不准三羣與爾嫂見面以前所失業已領回銅盆等件餘物不必深求本縣再將三羣枷號一月以為盜竊者戒仰即具領完案可也

批馬樹生呈詞

爾欠許永興之錢爾自清還薛同義欠爾之錢爾自向討不得抓沙抵水彼此牽混仰仍遵前斷先行措交許永興銀二百四十兩勿延干比

批張仁誠呈詞

爾聞爾堂姪張義為身故奉爾嫂之命出山尋我姪媳張蘭氏及姪孫等既於小峪河將伊母子四人一併尋獲即應領歸故里以慰爾嫂之望乃不待嫂命竟自託媒嫁賣實屬貪妄已極茲據稱尚長寬得妻後財禮分文未給反指爾為拐騙其中定有別情姑候喚案察訊

批司書完恂稟詞

該書既在公門豈得不知規矩稟中直呼趙委主之名胆妄已極惟據稱情實難甘姑准覆集訊究

批薛純科呈詞

查各里設立新甲係長安創辦咸甯仿行稟由層憲批准前縣出示遵行在案不得謂之違規取巧當十五年勅立之初爾等何以不即具稟經今三載乃以遺累為詞何其言之晚也不准

批糧書魏先庚稟詞

現據韋曲十甲糧正以額外勒索等情控爾等到案據稱向規前六後四僅出票錢七串今年忽索九串云云所爭不過兩串之微而亦來案曉曉互訟愚民無知可怒爾等身為典吏亦如此不知大體愧乎不愧不准特飭

批陳陳氏呈詞

招夫養子最為敝俗爾以孤孀招根遂兒為夫原圖養贍乃一無所得反將所蓄之二百八十串錢盡為所耗近則錢盡而人亦不至且以娶有元配為詞按厥事情恐左阿婆非媒妁也乃牽頭也爾與根遂兒非嫁娶也乃苟合也以苟合始以離異終男女兩人混帳已極候喚案一併重責以為不要臉者戒

批劉全倫呈詞